

EUSKAL-ERRIA

REVISTA VASCONGADA

T.º LXX

SAN SEBASTIÁN 30 DE ABRIL DE 1914

N.º 1103



BENITO DE LERSUNDI

BENITO LERSUNDI JAUNA

DONOSTIYAN jayo zan 1775^{-ko} Azaroa-ren 5^{-an}, ta biaramonian batayatuba izantzan Done Bizente-ren eleizan.

Gudalari pizkor eta bikañak sasoi guzietan sortu izan dira Euskal-errian, ta bulartsu ta trebienen artian asaldu liteke donostiar leñargi Benito Lersundi jauna.

Gipuzkoar gudarien buru izan zuben asiera ta napartarrakin urrena, ta batzubekin ta bestiakin beti esagutu zan bere ausarditasunez eta bere buru azkarrez.

Bi bider eritu zuten arerioak, baña suarriya bezela geruago ta pizkorrago ta sutsuago jarraitu ziyon bere egipen bikañai.

Frantzesak lur aben jabe egitera etorri ziranian, orduban buru ta anka ayen kalte ekin zion gogorki, ta arerioak nun, an zan Lersundi kalte aundiyak egiñaz, chirchillatubaz aurrian jartzen zitzaizkanak.

Portugal-araño irichi zan frantzesaren kalte-ko guda zorigaiztoko artan, ta Galizi-ko lurretan arrapatu zuten frantzesak eta ayen mendian egon biar izan zuben zerbait denboran.

Lazter samar, baña nai baño nekezago itsul egin zuben, ta guda amaitu arte batian ta bestian jasarra geyenetan arkitu zan.

Anai arteko guda zorigaiztoan ere egin bearra izan zuben; ta zala Salbatierra-n, zala Donostiya-n (bada bi uri oyetako gudari-buru egon zan) beti bezin pizkor eta trebe gorde zuben bere eginbearra.

Gizon atsegiña, buru azkarra, gudari bulartsua, denak goitutzen zuten bere egipenetan. Irichi zan gudarien artean diran nagusitasunik aundienetara, bada brigadier zan bere azkeneko egunetan.

1853^{-garren} urteko Garagar-illaren 20^{-an} il zan, ta bere gorputza Deba-ko ilerrian arkitzen da.

Goitu zagun guk ere donostiar pizkor eta bulartsu arren izena.